



CENTRALE BANK VAN ARUBA

BCA a dicidi di hisa e reserva obligatorio cu 2 punto di porciento entrante 1 di juli 2022.

Relato di prensa

Conforme e tarea di e Comite di Maneho Monetario (CMM) pa evalua, determina y provece transparencia riba e maneho monetario di Banco Central di Aruba (BCA), BCA ta comunica lo siguiente. Durante e reunion di 17 di juni 2022, CMM a dicidi pa sigui hisa e reserva obligatorio, esta di 22,0 porciento pa 24,0 porciento entrante 1 di juli 2022. Di e manera aki, e banconan comercial mester tene un balansa minimal na BCA, cu ta igual na 24,0 porciento di e depositonan riba termino cortico di nan clientenan. E decision aki ta basa primordialmente riba e nivel halto persistente di likides excesivo na e banconan comercial, como tambe riba un subida persistente den e tasa di inflacion.

E CMM a considera e siguiente informacion y analisis den su deliberacion:

Reservanan internacional

Reservanan internacional, cu ta consisti di reservanan oficial di BCA y reservanan di divisa teni pa banconan comercial a subi cu Afl. 385,0 miyon (Grafico 1) riba 3 di juni 2022, compara cu fin di december 2021. E subcomponente reservanan oficial tambe a aumenta cu Afl. 308,0 miyon durante e mesun periodo, mientras esunnan teni pa banconan comercial a subi cu Afl. 77,0 miyon. Consecuentemente, riba 3 di juni 2022, e reservanan oficial y internacional a suma Afl. 3.052,9 y Afl. 3.514,6 miyon, respectivamente. Pa e resto di 2022, ta premira expansion den reservanan oficial y internacional debi na mas entradanan di divisa relata na turismo, fiansanan di exterior, y inversion procedente di exterior. Pa e motibo aki, reservanan internacional ta anticipa di surpasa ampliamente tres luna di pagonan riba e cuenta corriente di e balansa di pago (cu ta consisti di pagonan pa importacion, pago na inversionistanan stranhero, y transferencianan pa exterior manera placa manda afo door di migrantenan). Ta pronostica cu e reservanan oficial tambe lo permanece dentro di e margen acceptabel basa riba e metrico 'Assesing Reserve Adequacy'(ARA) di e Fondo Monetario Internacional (FMI) (Tabel 1). E metrico FMI ARA ta basa riba un averahe di placa den circulacion, fiansa entre companianan liga na otro, debe externo, y exportacion di bienes y servicio.




Grafico 1: Desaroyonan den divisa.

Tabel 1: Metrichonan relata na reserbanan observa den 2022

	jan	feb	mrt	apr	mei
Cobertura di pagonan riba cuenta coriente ¹	8,7	8,7	9,3	10,2	9,0
Metriko di IMF ARA ²	107,6	107,0	111,6	124,2	122,9

¹ E cantidad di luna di pagonan riba cuenta coriente cu e reserbanan internacional ta cubri.

² E proporcion entre e nivel di reserbanan oficial y e nivel mínimo adecua (conforme IMF), den porcentage.

Inflacion

Na april 2022, e Indice di Prijs di Consumo (IPC) tabata 4,7 por ciento mas halto compara cu e mesun luna di e año anterior (Grafico 2). E aumento aki tabata causa primordialmente door di e aumento den prijs di gasoline, cu a afecta e componente di ‘transporte’ (contribuyendo cu 2,6 punto di porcentahe). Ademas, otro componentenan a contribui na e inflacion, esta ‘cuminda y bebida no alcoholico’ (contribuyendo cu 0,9 punto di porcentahe), ‘recreacion y cultura’ (contribuyendo cu 0,4 punto di porcentahe) y ‘restaurant y hotel’ (contribuyendo cu 0,3 punto di porcentahe) y ‘otro bienes’ (contribuyendo cu 0,3 punto di porcentahe).

Na final di april 2022, e inflacion midi riba promedio di 12 luna a subi te na 2,6 por ciento y ta premira pa sigui crece den 2022. E expectativa aki ta basa riba e aumento persistente di prijsnan, en particular na Estados Unidos y Europa. E aceleracion inflacionario den e partinan di mundo aki ta causa pa (1) e aumento den prijs di crudo, (2) e

problemanan continuo den produccion y cadena di suministro. Mientrastanto na april 2022, inflacion basico (excluyendo cuminda y energia) a yega 2.2 por ciento si midi e final di respectivo luna contra e luna di e aña anterior. Basa riba un promedio anual esaki a yega na 0.9 por ciento.

Grafico 2. Inflacion basa riba Indice di prijs di consumo
(Fuente: CBS, april 2022)




Grafico 2: Desaroyo inflacionario

Likides excesivo na banconan comercial

E total di likides excesivo na e banconan comercial a baha di Afl. 1.320,5 milyon (December 2021) pa Afl. 1.109,5 milyon (April 2022) (Grafico 3). E caida aki den likides excesivo ta debi primordialmente na e subida consecutivo den e reserva obligatorio door di BCA durante e prome cuater lunanan di 2022. No obstante, e nivel di likides excesivo a keda significantemente mas halto cu e nivelnan midi prome cu e pandemia (+ Afl. 420,4 milyon). Esaki tabata a causa di e demanda abou pa credito, ademas di e nivel eleva di fondonan di likides na banconan comercial. Fondonan di likides ta consisti di cash, bononan di gobierno y otro activo likido.

Grafico 3: Likides excesivo di banconan comercial den miyon di florin
(Fuente: BCA)




Grafico 3: Desaroyo den likides excesivo

Desaroyo den credito

Durante april 2022, credito total di e banconan comercial a mengua cu Afl. 34,9 miyon (of 0,9 por ciento) te na Afl. 3.790,0 miyon, compara cu december di 2021. E caida aki tabata debi principalmente na ‘credito na empresa’ (Afl. 25,0 miyon). E componente ‘otro’ tambe a pone presion adicional riba menos demanda pa credito, cayendo cu Afl. 10,3 miyon. No obstante, ‘credito na individuo’ a subi levemente cu Afl. 0,5 miyon. Pa e resto di 2022, ta premira cu credito bancario total lo keda flat. Den e caso aki, likides excesivo lo keda halto, dunando motibo pa sigui hisa e reserva obligatorio.

Desaroyo den deposito di banconan comercial

Na april 2022, e total di depositonan (excluyendo depositonan interbancario y depositonan di Gobierno di Aruba) na banconan comercial local a yega un nivel eleva di Afl. 5.136,7 miyon, compara cu Afl. 5.079,0 miyon registra na december 2021. Depositonan a expande debi cu depositonan riba cuenta corriente (Afl. 150,0 miyon) a aumenta y cuentanan di spaar a crece levemente (Afl. 6,7 miyon). Na mesun momento, un contraccion den depositonan riba termino fijo (Afl. 99,1 miyon) a parcialmente mitiga e aumento aki.

Banco Central di Aruba

9 augustus 2022